

DOWLADDA PUNTLAND  
EE SOOMAALIYA  
XAFIISKA  
GARYAQAANKA GUUD



ولاية بونت لاند  
الصومالية  
مكتب  
المحامي العام للدولة

PUNTLAND STATE OF SOMALIA  
OFFICE OF THE SOLICITOR GENERAL

SANADKA 20<sup>AAD</sup>

CADADKA 9<sup>AAD</sup>

TAARIIKH: 12/15/20

Lam. 05

FAAFINTA RASMIGA AH

OFFICIAL GAZETTE

الجريدة الرسمية

WAX-KA-BEDELKA SHARCIGA ISGAARSIINTA

TUSMADA

Qeybta 1 <sup>aad</sup>	Xeerarka Baarlamaanka iyo Heshiisyada Caalamiga ah <b>WAX-KA-BEDELKA SHARCIGA ISGAARSIINTA</b>
Qeybta 2 <sup>aad</sup>	Xeerarka iyo Digreetooyinka Madaxweynaha. <b>WAXBA MALEH</b>
Qeybta 3 <sup>aad</sup>	Xeer Nidaamiyeyaasha Wasaaradaha, Xeerarka Goleyaasha Deegaanka iyo Barnaamijyada Dowladda. <b>WAXBA MALEH</b>
Qeybta 4 <sup>aad</sup>	Go'aanadda Maamulada iyo Qaraarada Maxkamadaha. <b>WAXBA MALEH</b>
Qeybta 5 <sup>aad</sup>	Amarada, Ogeysiisyada iyo Qandaraasyada Dowladda. <b>WAXBA MALEH</b>



2DOWLADDA PUNTLAND  
EE SOOMAALIYA

XAFIISKA  
MADAXWEYNAHA



ولاية بونت لاند  
الصومالية

مكتب  
الرئيس

PUNTLAND STATE OF SOMALIA  
OFFICE OF THE PRESIDENT

Sharci Lr.5 ee December 15, 2020, kuna saabsan Wax-ka-beddelka Sharciga Isgaarsiinta Dowladda Puntland.

Madaxweynaha Dowladda Puntland

Markuu arkay: Dastuurka Dowladda Puntland Qodobkiisa 80<sup>aad</sup> farqadiisa 16<sup>aad</sup> iyo Qodobka 35<sup>aad</sup>.

Markuu arkay: Ansixinta Golaha Wakiilada Dowladda Puntland ee Summadeedu tahay XGGW/DPL/122/2020, kuna taariikhaysan December 9, 2020.

Markuu tixgeliyey: Muhiimada Xeerkani u leeyahay horumarinta Isgaarsiinta iyo wacyigelinta Bulshada.

Wuxuu soo saaray

Sharciga soo socda:

Qodobka 1<sup>aad</sup>


Golaha Wakiiladu waxay ansixiyeen Wax-ka-beddelka Xeerka Isgaarsiinta Dowladda Puntland.


Qodobka 2<sup>aad</sup>

Nuqulada asalka ah (Original) waxaa lagu kala kaydinayaa Xafiiska Madaxweynaha, Xafiiska Xoghayaha Guud ee Baarlamaanka iyo Xafiiska Garyaqaanka Guud ee Dowladda

Qodobka 3<sup>aad</sup>

Dhaqangal Sharcigani wuxuu noqonayaa markuu Madaxweynuhu saxiixo laguna soo saaro faafinta rasmiga ah ee Dowladda Puntland

  
Siciid Cabdullaahi Deni  
Madaxweynaha Dawladda Puntland



DAWLADDA PUNTLAND  
EE SOOMAALIYA  
GOLAHA WAKIILLADA



ولاية بونت لاند الصومال

مجلس النواب

Xafiiska Guddoomiyaha  
Office of the Speaker

Tix:-XGGW/DPL/122/2020 Garoowe, Arbaca, Taariikh:- 09/12/2020

Ku:- Madaxweynaha DPL

Garoowe

Ujeedo:- Ansixinta Wax-ka-bedelka Xeerka Isgaarsiinta Puntland  
Mudane Madaxweyne.

GUDDOOMIYAHA GOLAHA WAKIILLADU: -

MARKUU ARKAY:-

MARKUU ARKAY:-

MARKUU ARKAY: -

MARKUU TIX-GELIYEEY:

MARKUU DHEGEYSTEEY: -

MARKUU ARKAY: -

WUXUU GUDDOOMIYEEY:-

Ansixinta Wax-ka-bedelka Xeerka Isgaarsiinta Dawladda Puntland.

Wada Shaqeyn Wacan

Md. Cabdirashiid Yuusuf Jibriil  
Guddoomiyaha Golaha Wakiillada DPL.





**DAWLADDA PUNTLAND EE SOOMAALIYA**

**GOLAHA WAKIILLADA PUNTLAND**

---

**WAX-KA-BEDELKA XEERKA ISGAARSIINTA DAWLADDA PUNTLAND**

---

**GAROOWE, NOFEEMBAR, 2020**



# TUSMO

## Bogga

QODOBKA 1-AAD Nidaamka Guud Eray Bixin	2
Qodobka 2-aad Magaca Xeerka	3
Qodobka 3-aad Ujeeddada Xeerka	3
Qodobka 4-aad Baaxadda Xeerka	3
Qodobka 5-aad Xilka iyo Waajibaadka Wasaaradda	3
Qodobka 6-aad Naqshadayn	4
Qodobka 7-aad Buugga Lambarada Wicitaanka ( Directory Book)	4
Qodobka 8-aad Oggolaanshaha Taawarada Isgaarsiinta	5
Qodobka 9-aad Machadyada Isgaarsiinta	5
Qodobka 10-aad Sanduuqa Xarkaha ( Cable Box)	5
Qodobka 11-aad Soo Saarista Xeer-nidaamiyeyaal	5
Qodobka 12-aad Dalabka Xogta Amniga	6
Qodobka 13-aad Wada tashiga wasaaradda iyo shirkadaha isgaarsiinta	6
Qodobka 14-aad Habka Go'aan qaadashada	6
Qodobka 15-aad <u>Dib-u-eegista Go'aanka</u>	7
Qodobka 16-aad Maamulka Hirarka	7
Qodobka 17-aad Xarigga Fiber Optic	8
Qodobka 18-aad Ruqsadaha	8
Qodobka 19-aad Shuruudaha Codsiga Ruqsada	8
Qodobka 20-aad Cusboonaysiinta Ruqsadda	9
Qodobka 21-aad Katanaasullidda ama dib-usoo celinta Ruqsadda	9
Qodobka 22-aad Kala noqoshada Ruqsadda	9
Qodobka 23-aad Codsiga Isku-xirka shabakadaha adeegga isgaarsiinta	10
Qodobka 24-aad Shuruudaha isku-xirka shabakadaha adeegga isgaarsiinta	10
Qodobka 25-aad Xeer nidaaminta isku xirka shabakadaha adeegga isgaarsiineed	11
Qodobka 26-aad Qoondaynta iyo Bixinta lambarada	11
Qodobka 27-aad Diidmada Codsiga Bixinta lambarada	11
Qodobka 28-aad Xeer nidaaminta lambarada	11
Qodobka 29-aad Xuquuqda Shirkadaha iyo Maalgashadayaasha	12
Qodobka 30-aad Oggolaansha qalabka isgaarsiinta	12
Qodobka 31-aad Xaqa Marinka Adeeg Bixiyaha	12
Qodobka 32-aad Helitaanka Adeeg Isgaarsiineed oo Baahsan	12
Qodobka 33-aad Tartanka suuqa Xorta ah ee Isgaarsiinta	13
Qodobka 34-aad Ku takrifalida awoodda suuqa	13
Qodobka 35-aad Faafreebka	13
Qodobka 36-aad Diiwaangalinta-lafta (Sim card)	14
Qodobka 37-aad Hirgalinta Xeerkan	14
Qodobka 38-aad Ganaax	14
Qodobka 39-aad Iska hor-imaadka Danaha Isdiidan	15
Qodobka 40-aad Burin	15
Qodobka 41-aad Dhaqan-galka	15



## OODOBKA 1 -aad

### Erey Bixin

1. **Xeer:** Waxaa loola jeedaa Xeerka Isgaarsiinta Dawladda Puntland.
2. **Isgaarsiin:** Waxaa loola jeedaa adeeg kasta oo Isgaarsiineed oo uu bixiyey adeeg bixiye oggolaansho ka haysta Wasaaradda si waafaqsan xeerkan.
3. **Wasaarad:** Waxaa loola jeedaa Wasaaradda Warfaafinta, Isgaarsiinta iyo Dalxiiska Puntland.
4. **Wasiir:** Waxaa loola jeedaa Wasiirka Wasaaradda Warfaafinta, Isgaarsiinta iyo Dalxiiska Puntland.
5. **Shirkad Wadani ah:** Waxaa loola jeedaa shirkad Isgaarsiineed oo ay leeyihiin muwaadiniin/ muwaadin Soomaaliyeed oo sifo xeerkan waafaqsan loogu oggolaaday inay bixiso adeeg Isgaarsiineed.
6. **Shirkad Ajnebi ah:** Waxaa loola jeedaa Shirkad ajnebi ah oo sifo xeerkan waafaqsan loogu oggolaaday inay bixiso adeeg Isgaarsiineed.
7. **Ruqsad:** Waxaa loola jeedaa oggolaansho ay bixisay Wasaaraddu si waafaqsan xeerkan.
8. **Hirarka raadiyaha isgaarsiinta:** Waxaa loola jeedaa qayb ka mid ah mowjadaha raadiyaha ee Wasaaraddu u qoondayso adeegyadda isgaarsiinta madaxa-bannaan, Idaacadaha iyo Telefishinada (Muuqaal-baahiye).
9. **Furaha Qaranka (national code):** Waxaa loola jeedaa **(252)** oo ah Hanti Qaran.
10. **Summadda Qaranka (domain):** Waxaa loola jeedaa **(.So)** oo ah Hanti Qaran loona adeegsado Internet-ka.
11. **Fiber- optic:** Waxaa loola jeedaa dhagaatiyada xambaara internet-ka iyo hirarka isgaarsiinta ee casriga ah.
12. **Adeeg bixiye:** Waxaa loola jeedaa Shirkad ay oggolaansho u siisay Wasaaraddu inay bixiso adeeg Isgaarsiineed si waafaqsan xeerkan.
13. **Taawar (tower):** Waxaa loola jeedaa biraha dhaadheer ee waddooyinka iyo buuraha ka taagan miyi iyo magaalo kuna xiran yihiin dhiishashka ama durbaannada (Drams) ama Anteenoooyinka Mobil-ka (BTS) iyo qalab kale sida Micro-wave IWM.
14. **Laamaha Shirkad Isgaarsiineed:** Waxaa loola jeedaa xarumaha Shirkadda ee heer degmo iyo heer gobol.
15. **V-sat:** Waxaa loola jeedaa saxan (dhis) yar oo isgaarsiinta loo isticmaalo inuu Intarnet ama xog (Data) ka keeno Sataleyt-ka (Satellite), isagoo ka soo qaadaya xarun kale loona isticmaalo guryaha ama xafiisyada.
16. **Cable BOX:** Waxaa loola jeedaa saxamo ku xiran satellite-ka oo la isku ururshay lagana dhigo Santuukh laga daawado Kannaallada TV-ga sida Ciyaaraha, Wararka iwm.
17. **Maxkamadda awoodda u leh:** Waxaa loola jeedaa maxkamadda awoodda dhanka maadada iyo xuduudka u leh qaadista dacwada.
18. **WHO:** Waxaa loola jeedaa Hay'adda Caafimaadka Adduunka.
19. **ITU:** Waxaa loola jeedaa Ururka Caalamiga ah ee Isgaarsiinta.



**Qodobka 2-aad**  
**Magaca Xeerka**

Xeerkan waxaa lagu magacaabaa Xeerka Isgaarsiinta Dawladda Puntland.

**Qodobka 3-aad**  
**Ujeeddada Xeerka**

Ujeeddooyinka xeerkan waxaa ka mid ah;

1. Inuu horumariyo siyaasadda isgaarsiinta iyo tiknoolojiyada DPL.
2. In lagu nidaamiyo laguna maamulo dhammaan qaybaha Isgaarsiinta, War-baahinta, Boostooyinka iyo Madbacadaha ee ka jira degaannada Dawladda Puntland.
3. Tayaynta adeegyada Isgaarsiinta iyo wada shaqaynta shirkadaha.
4. Horumarinta Isgaarsiinta casriga ah si kor loogu qaado wacyiga bulshada iyo isticmaalka adeegyada internetka.
5. Ilaalinta xogta gaarka ah ee qofka.
6. Maamulka, horumarinta iyo qaybinta isticmaalka dhammaan hirarka Isgaarsiinta.
7. Abuurista suuq xor ah iyo tartan furan ee adeegayada Isgaarsiinta.
8. Bixinta ruqsadaha Isgaarsiinta si waafaqsan xeerkan.
9. Dhiiri-gelinta maalgashiga Isgaarsiinta, iyadoo la tix-gelinayo Shirkadaha wadaniga ah.
10. Inuu kor u qaado koboca dhaqaalaha Puntland.
11. Ilaalinta xuquuqda shirkadaha Isgaarsiinta iyo adeegyada la xiriira.

**Qodobka 4-aad**  
**Baaxadda Xeerka**

Xeerkan waxaa lagu maamulayaa dhammaan shirkadaha Isgaarsiinta ee ka jira degaannada Puntland, marka laga reebo Isgaarsiinta ay isticmaalaan ciidamadu.

**Qodobka 5-aad**  
**Xilka iyo Waajibaadka Wasaaradda**

Wasaaraddu waxay u xil-saaran tahay;

1. Diyaarinta soo bandhigidda siyaasadda guud iyo qorshaha Isgaarsiinta Puntland, iyadoo la tashanaysa dhinacyada ay khusayso.
2. Horumarinta istaraatiijiyada siyaasadeed ee lagu fidinayo baaxadda adeegga Isgaarsiinta, si kor loogu qaado koboca dhaqaalaha Puntland.
3. Dhisidda macaahid lagu barto culuumta Isgaarsiinta si ay uga faa'iidaystaan shaqaalaha dawladda, shirkadaha Isgaarsiinta iyo dhammaan bulshada Puntland.



4. Kormeeridda iyo la xisaabtanka shirkadaha Isgaarsiinta, hay'adaha War-baahinta, Boostooyinka iyo Madbacadaha.
5. Ku wacyigelinta bulshada macluumaadka aqooneed ee ku saabsan Isgaarsiinta, helidda aqoonta tiknolojiyadda casriga ah, ka qaybqaadashada kobcinta dhaqaalaha, horumarinta iyo sare u qaadidda ilbaxnimada bulshada.
6. Ilaalinta habsami u socodka adeegga Isgaarsiinta iyo internetka.
7. Wasaaraddu waxay mas'uul ka tahay maamulidda adeegyada Isgaarsiinta sida qorshaynta, bixinta ruqsadaha, qoondaynta isticmaalka hirarka Raadiyaha, Tv-yada, mobile-ka, internetka, xeer-nidaaminta iyo Isgaarsiinta kale ee dalka.
8. Soo jeedinta canshuuraha la-xiriira maaraynta hirarka, isku-xirka iyo la socodka shabakadaha iyo adeegyada Isgaarsiineed.
9. Soo saarista xeer-nidaamiyeyaal lagu hawlaha Isgaarsiinta, iyadoo la tashaneysa shirkadaha Isgaarsiinta.
10. Xallinta khilaafaadka shirkadaha Isgaarsiinta, iyadoo u saaraysa guddi farsamo oo dhexdhexaadiya.
11. Wasaaraddu waxay qaadanaysaa tallaabooyinka lagama-maarmaanka u ah si loo xakameeyo ciddii jebisa ama ku xadgudubta xeerkan.
12. Oggaanshaha agab kasta oo Isgaarsiineed, War-baahineed, Boosto ama madbacad ee ka soo gala dekedaha, garoomada diyaaradaha iyo baraha kaantaroolada si loo hubiyo tayada qalabkaas.
13. Shirkad kasta oo Isgaarsiineed waxay bil kasta u gudbineysaa Wasaaradda iyo Wasaaradda Maaliyadda xisaab-xirka shirkadda oo ka kooban dakhli, kharash iyo mushaharka shaqaalaha si Wasaaradahaasi ula socdaan.

### **Qodobka 6-aad**

#### **Naqshadayn**

1. Shirkad kasta oo Isgaarsiineed iyo cid kasta oo xarig (cable) dhulka marineysa ha u jiiideyso meel dhow ama meel dheer, waa iney Waasaaradda u soo gudbisaa naqshadda (design), si looga fogaado in aaney shirkadi shirkad kale xarkeheeda waxyeelo u geysan ama dusha ka marin iyo in aaney waxyeelo u geysan meelaha muhiimka ah sida, buundooyinka, waddooyinka laamiga ah iwm.
2. Shirkad kasta oo waxyeelo u geysata hantida dawladda iyo midda gaarka loo leeyahay ama deegaanka, waxay bixinaysaa mag-dhaw u dhigma waxyeelada ay geysatey.

### **Qodobka 7-aad**

#### **Buugga Lambarada Wicitaanka (Directory Book)**

Shirkad kasta oo Isgaarsiineed waa inay Wasaaradda iyo ciddii kale ay khusayso u soo gudbiyaan diiwaannada lambarada muhiimka ah ee adeegga bulshada hadba kan ugu dambeeya si loo helo lambarada gurmada deg-dega ah sida dab-damiska, laamaha amniga, caafimaadka iwm.



### **Qodobka 8-aad**

#### **Oggolaanshaha Taawarada Isgaarsiinta**

1. Shirkad, Idaacad ama Telifishan (TV) iyo cid kasta oo taawar (tower) ama anteenada ka taagaysa meel ka mid ah dhulka Puntland waa inuu oggolaansho (ruqasad) ka haysto Wasaaradda.
2. Shirkad, Idaacad ama Telifishan (TV) iyo cid kasta oo taawar ama anteenada ka taageysa meel ka mid ah dhulka Puntland in ka badan 15m waa in ay madaxa sare ee taawarka ama anteenada ku xirto nalka cas (Guduudan) si ay uga digtoonaadaan diyaaradaha habeenkii joogga hoose ku duulaya loogana fogaado iney waxyeelo u geystaan diyaaradahaas.
3. Wasaaraddu waxay hubineysaa in meesha laga taagayo anteenada ama taawarka ay tahay mid ku habboon iyo tayada qalabkaas, si looga fogaado waxyeelada caafimaad ee ka dhalan karta.
4. Shirkad, Idaacad, Telifishan iyo cid kasta oo u hoggaansami weyda arrimaha ku xusan faqrada 1-aad iyo 2-aad ee qodobkan waxay mutaysanayaan ganaax lacageed oo ay Wasaaraddu jaangoysey kuna soo saartay xeernidaamiye.
5. Wasaaraddu waxay hubinaysaa masaafada ay isu jirsanayaan taawarada Isgaarsiintu in aanay ka yaraan Hal Kiilo Miter (I KM).

### **Qodobka 9-aad**

#### **Machadyada Isgaarsiinta**

Machadyada culuumta Isgaarsiinta ee ka hawl-gala Puntland waa inay iska diiwaan-geliyaan Wasaaradda.

### **Qodobka 10-aad**

#### **Sanduuqa Xarkaha (Cable Box)**

1. Shirkadaha ku shaqaysta adeegga sanduuqa xarkaha (cable Box) waa inay iska diiwaan-geliyaan Wasaaradda.
2. Waxaa reeban in shirkadaha ku shaqaysta adeegga ku xusan farqada 1-aad ay soo samaystaan qalabka, iyagoo aan loo qoondayn hirarkii ay isticmaali lahaayeen si aysan u gelin hirar hore loogu qoondeeyey shirkad kale.

### **Qodobka 11-aad**

#### **Soo Saarista Xeer-nidaamiyeyaal**

1. Wasaaraddu iyadoo la tashanaysa shirkadaha Isgaarsiinta waxay soo saaraysaa xeer-nidaamiyeyaal ay kula dhaqmayso shirkadaha Isgaarsiinta sida;
  - b) Ilaalinta Caafimaadka oo saldhig looga dhigayo heerarka Caalamiga ah ee WHO iyo ITU.



- t) Anshaxa iyo dhaqanka oo saldhig looga dhigayo Shareecada Diinta Islaamka iyo dhaqanka suuban ee Soomaaliyeed.
- j) Hab-dhaqanka shirkadaha iyo ilaalinta ku xad-gudubka xeerkan.

### **Qodobka 12-aad**

### **Dalabka Xogta Amniga**

Laamaha amniga iyo nabadgelyada ee leh awoodda daba-galka Dawladda Puntland, waxay xaq u leeyihiin inay shirkadaha Isgaarsiinta ka helaan wixii xog ah ee khuseeya arrimaha amniga iyo nabadgelyada, iyadoo la dhawraayo xuquuqda xogta macmiilka loona marayo sifo sharci ah.

### **Qodobka 13-aad**

### **Wada-tashiga Wasaaradda iyo Shirkadaha Isgaarsiinta**

Wasaaraddu waxay qabanaysaa: -

- b) Wada-tashi ka kooban dhinacyada Wasaaradda iyo shirkadaha isgaarsiinta, sannadkiiba laba jeer.
- t) Wada-tashi daah-furan si loo gaaro qorshaha dawladdu ka leedahay siyaasadda guud ee Isgaarsiinta, loogana wada shaqeeyo danta guud iyo kalsooni dhex-marta dawladda iyo shirkadaha Isgaarsiinta, haddii ay Wasaaraddu u aragto inaan looga maarmi karin shirkadaha.
- j) Tallooyinka ka soo baxa wada-tashiga Wasaaraddu waxay shirkadaha Isgaarsiinta siinaysaa tix-gelin hadba baahidii laysla gartay iyadoo la waafajinayo xeerkan.

### **Qodobka 14-aad**

### **Habka Go'aan Qaadashada**

1. Wasaaraddu waxay qaadansaa door dhexdhexaadin haddii khilaaf ama isqabad uu soo kala dhex galo shirkadaha Isgaarsiinta iyadoo dhegaysanaya dhinacyada is haya.
2. Arrin kasta oo hortaala Wasaaraddu waxay ka soo saari kartaa jawaab qoraal ah, taas oo lagu sharaxayo sababaha tallaabooyinka ay u qaaday iyo in ay ku salaysan tahay xaqiiqada macluumaadka horyaal.
3. Wasaaraddu waxay diidi kartaa talaabo kasta ama codsi kasta oo aan waafaqsanayn xeerkan iyadoo sababaynaysa. Ciddii aan ku qancin go'aanka Wasaaradda waxay dacwadeeda u gudbin kartaa Maxkamadda awoodda u leh.



**Qodobka 15-aad**  
**Dib-u-eegista Go'aanka**

1. Cid kasta oo dhibbane ku noqotay sabab la xiriirta go'aannada ay gaartay Wasaaraddu, wuxuu ka codsan karaa Wasaaradda in ay dib-u-eegis ku samayso go'aankeedii hore.
2. Dhammaan xaaladaha lagu codsanayo dib-u-eegista waxay Wasaaraddu bixinaysaa ogaysiis oo ay ku gaarsiinayso cidda ay khusayso in go'aankii ay horay u gaartay Wasaaraddu dib-u-eegis laga codsaday iyadoo tix-galinaysa dhammaan dhinacyada ay khusayso.
3. Cid kasta oo ku qanci weyda go'aanka Wasaaradda wuxuu u dacwoon karaa maxkamadda awoodda u leh.

**Qodobka 16-aad**  
**Maamulka Hirarka**

Wasaaraddu iyadoo gudanaysa xilkeeda ku saabsan maamulka hirarka waxay mas'uul ka tahay arrimaha soo socda: -

1. Dhiiri-gelinta in loo isticmaalo hirarka ama mawjadaha si nidaam iyo beekhaamin cilmiyeysan leh, si rukhsadda adeeg bixiyaha la siiyey ugu filaato qoondada hirarka ku aaday.
2. Wasaaraddu waxay qorshaynaysaa, isla markaasna maamulaysaa shaxda qoondaynta iyo bixinta hirarka si waafaqsan xeerkan.
3. Wasaaraddu waxay aqoonsanaysaa hirarka isgaarsiinta ee ay shirakdaha hadda jira hore u isticmaali jireen iyada oo la waafajinayo xeerkan.
4. Wasaaraddu waxay u qoondaynaysaa/siinaysaa hirarka isticmaalayaasha soo socda;
  - b) Hay'adaha Amniga.
  - t) Dab-damisyada iyo Badbaadada Dadweynaha.
  - j) Hay'adaha Warbaahinta.
  - x) Shirkadaha Isgaarsiinta.
5. Wasaaraddu waxay xaqiijineysaa adeeg bixiyayaasha ruqsadda leh;
  - b) Inay ka qayb qaataan adeeg bixiyaasha ka ganacsada Isgaarsiinta kobcinta dhaqaalaha dalka iyo horumarinta Isgaarsiinta.
  - t) Khidmadaha laga qaado adeeg bixiyayaasha waxaa lagu shubayaa khasnadda guud ee dawladda Puntland si waafaqsan xeerka Maamulka Maaliyadda PL.



**Qodobka 17-aad**  
**Xarigga Fiber Optic**

Shirkad kasta oo Isgaarsiineed oo doonaysa in ay soo jiidato oo ay keento dhulka Dawladda Puntland Xarigga Fiber Optic waa in ay fasax ka qaadataa Wasaaradda inta aysan soo jiidan ka hor.

**Qodobka 18-aad**  
**Ruqsadaha**

1. Shirkad kasta oo ka shaqaysanaysa adeeg la xiriira Isgaarsiin, Warfaafin, Dhaqan iyo Dalxiis waa inay qaadataa ruqsadda (Shatiga) Wasaaradda.
2. Shirkad kasta oo Shatiga qaadata, waa inay iska bixisaa khidmadaha kale ee ku waajibay.
3. Qofna kuma shaqaysan karo shabakad Isgaarsiineed, isagoo isticmaalaya hirarka raadiyaha ee Isgaarsiinta, saldhig warbaahin ama bixin adeeg isgaarsiineed, asagoo aan u haysan ruqsad.
4. Ruqsadlaha aan isticmaalin ama aan ku shaqaysan ruqsadda adeeggii uu u qaatay mudo sannad gudahiis ah way ka dhacaysaa ruqsaddu.
5. Wasaaradu waxay ruqsad siinaysaa ciddii ka soo codsata, isla markaana buuxisa shuruudaha ku waajibey.
6. Ruqsadda ay bixisay Wasaaraddu si waafaqsan xeerkan laguma wareejin karo, lagamana iibin karo qayb ama dhammaan shakhsi ama shirkad kale, iyadoo aan oggalaansho qoraal ah laga helin Wasaaradda.
7. Ruqsadda guud waxaa la siinayaa codsadaha marka uu buuxiyo shuruudaha loo dejiyey, iyadoo Wasaaraddu ka dalban karto xog dheeraad ah.
8. Codsaduhu wuxuu buuxinayaa foom-ka ruqsadda guud ee Wasaaraddu diyaarisay.
9. Muddada ruqsadda guud ee adeeg bixiye isgaarsiineed waxaa lagu nidaaminayaa xeer-nidaamiyaha Wasaaradda.

**Qodobka 19-aad**  
**Shuruudaha Codsiga Ruqsadda**

Shirkad kasta oo doonaysa in Wasaaraddu oggalaansho u siiso bixinta adeeg Isgaarsiineed waxay soo gudbineysaa codsi ay ku lifaaqan yihiin;

1. Magaca Shirkadda oo dhammaystiran.
2. Nooca adeeg ee ay bixineyso.
3. Xogta iyo sharciyadda shirkadda (Profile).
4. Hantida shirkadda iyo baaxadda ay ka hawl-gelyso.
5. Qoraal caddaynaya in shirkaddaasi u hoggaansami doonto qawaaniinta iyo nidaamka Dawladda Puntland.



**Qodobka 20-aad**  
**Cusboonaysiinta Ruqsadda**

1. Wasaaraddu waxay cusboonaysiinaysaa ruqsad, markuu ruqsadluhu soo codsado una hoggaansamo dhammaan shuruudihii hore ee lagu siiyey rukhsadda sida ku cad xeerkan.
2. Haddii ruqsaddu ay ka dib dhacdo wakhtigii loogu tala galay in loogu cusboonaysiiyo rukhsadlaha, waxaa loo tix-gelinayaa duruufaha keeni kara dib-u-dhac sababaysan, haddii la waayo sabab cad wuxuu mudan doonaa ganaax sida ku cad xeer-nidaamiyaha Wasaaradda.
3. Haddii ay dhacdo in Wasaaraddu cusboonaysiin waydo codsigaas, rukhsadlaha wuxuu wadan karaa hawlihiisa shaqo si waafaqsan shuruudihii hore loogu siiyey ilaa inta Wasaaraddu ka gaarayso go'aanka cusboonaysiinta.
4. Mar kasta oo Wasaaraddu qaadanayso go'aan diidmo cusboonaysiin, ama ay saarayso ganaax rukhsadluhu jabiyey shuruudihii lagu siiyey rukhsadda si waafaqsan xeerkan, Wasaaraddu waxay ka gaaraysaa go'aan, iyadoo ku soo gudbinaysa hab qoraal ah.

**Qodobka 21-aad**  
**Ka-tanaasullidda ama Dib-usoo Celinta Ruqsadda**

Rukhsadluhu wuxuu Wasaaradda dib ugu soo celin karaa rukhsada uu qaatay, waxayna hirgelayaa waqti walba oo ay Wasaaraddu ka hesho qoraalka rasmiga ah rukhsadlaha.

**Qodobka 22-aad**  
**Kala Noqoshada Ruqsadda**

Wasaaraddu waxay amar qoraal ah ku hakin kartaa ama ka soo ceshan kartaa rukhsaddii ay bixisay marka ay dhacaan xaaladaha soo socda;

1. Haddii rukhsadluhu fulin waayo xeerkan iyo xeer-nidaamiyeyaasha ay soo saartay Wasaaraddu, bixinna waayo khidmadda ku waajibtay ama ganaax lagu saaray ku xad-gudubka xeerka Isgaarsiinta.
2. Haddii uu ku qanci waayo ruqsadluhu go'aanka Wasaaradda ee ku saabsan kala noqoshada ruqsada wuxuu u dacwoon karaa maxkamadda awoodda u leh.

**Qodobka 23-aad**  
**Codsiga Isku-xirka Shabakadaha Adeegga Isgaarsiinta**

1. Isku xirka adeegga Isgaarsiinta talefoonnada waa dan guud, waxaana lagama-maarmaan ah in laysu furo khadadka shirkadaha kala duwan ee ka ganacsada adeegga talefoonnada, si loogu sahlo bulshada inay wada xiriiri karaan, iyadoo shirkado kala duwan isticmaalaya.



2. Haddii adeeg bixiye Isgaarsiineed oo leh rukhsad adeeg uu ka codsado isku xirka shirkad kale oo adeeg Isgaarsiineed bixisa waxaa la waafajinayaa Xeerka Isgaarsiinta iyo heshiiska u dhexeeya labada shirkadood.

#### **Qodobka 24-aad**

#### **Shuruudaha Isku-xirka Shabakadaha Adeegga Isgaarsiinta**

1. Dhammaan heshiisyada isku-xirka shirkadaha Isgaarsiintu galaan wuxuu noqonayaa qoraal, waxaana heshiis walba laga diiwaangelinayaa Wasaaradda.
2. Dhinacyada galay heshiiska isku xirka kama bixi karaan heshiiskooda ayagoon ka haysan oggolaansho qoraal ah Wasaaradda.
3. Haddii ay dhinacyadu gaari wayaan go'aan la isku raacsan yahay, Wasaaraddu waxay dhexdhexaadin iyo isu soo dhawayn ka galaysaa arrinta laysku hayo, iyadoo mudnaan la siinayo danta guud loona marayo sifo sharci ah.
4. Haddii dhexdhexaadinta Wasaaradda dhinacyada dhinac ka mid ku qanci-waayo, wuxuu uga dacwoon karaa Maxkamadda awoodda u leh.
5. Haddii shirkadi bixin wayday lacagta lagu yeeshay ee ka dhalatay isku xirka shirkadaha muddo 24-maalmood ah waxay waayaysaa xiriirka isku xirka shirkadaha, waxaana lagu dhaqayaa xeer- nidaamiyaha Wasaaradda.
6. Waa in laga heshiiyaa hawlgalka ka hor qodobadan.
  - b) Inuu cad yahay Baaxadda isku xirka (Inter-connection)
  - t) Inuu cad yahay qiimaha isku xirka daqiiqaddii.
  - j) Inaan qiimaha isku xirka lagu tartami karin.

#### **Qodobka 25-aad**

#### **Xeer Nidaaminta Isku-xirka Shabakadaha Adeegga Isgaarsiineed**

1. Wasaaraddu waxay samayn kartaa xeer-nidaamin la xiriirta isku-xirka shirkadaha oo qeexaysa arrimaha soo socda: -
  - b) Wakhtiga iyo wada xaajoodka gunaanadka heshiiska isku-xirka.
  - t) Tayada iyo heerka adeegga.
  - j) Habraaca loo qaadayo tariifada.
  - x) Xafididda lahaanshaha gaarka ah.
  - kh) Xafididda xogaha ganacsiga.
  - d) Fududaynta isku-xirka dhinacyada.
  - r) Isu soo dhawaynta iyo dhexdhexaadinta qiimaha isku-xirka marka ay dhinacyadu ku heshiin waayaan.



### Qodobka 26<sup>-aad</sup>

#### Qoondaynta iyo Bixinta Lambarada

1. Wasaaraddu waxay qoondaynaysaa qaabka loo isticmaalayo lambarada dalka, sidaa darteed shirkad kasta oo Isgaarsiineed waxay soo codsanaysaa in le'eg baahideeda, waxayna xaq u leeyihiin inay helaan lambaro baahidooda ku filan.
2. Waxaa reebban in la isticmaalo lambarada Qaranka, iyadoo aan la haysan ruqsad ay bixisay Wasaaraddu.

### Qodobka 27<sup>-aad</sup>

#### Diidmada Codsiga Bixinta Lambarada

1. Xeerkani wuxuu qeexayaa habka diidmada qayb ama dhammaan codsi la xiriira isticmaalka lambarada iyo diiwaangelinta magaca shabakadaha bixiya adeegga internet-ka haddii ay dhacaan arrimaha soo socda;
  - b) Haddii codsaduho aanu haysan rukhsad uu ku bixin karo adeegga isgaarsiinta iyo internet-ka.
  - t) Haddii ujeedada isticmaalka lambarada la soo codsaday ay halis ku yihiin jiritaanka Shirkadaha Isgaarsiinta iyo amniga sida xatooyada iwm, waxaa loo cuskan karaa xeerka cigaabta.
  - j) Codsaduho dib ayuu u soo codsan karaa lambarada ama diiwaan-galinta shabakadda internet-ka uu dalbanayo, isagoo dib-u-habayn ku soo samaynaya qodobadii iyo sababihii loogu diiday soona waafajinaya habraaca Wasaaradda.
  - x) Haddii ay Wasaaraddu diido codsiga bixinta lambarada ama diiwaan-galinta shabakadda adeegga internet-ka si waafaqsan Xeerkan, Wasaaraddu waxay ku soo saaraysaa go'aan qoraal ah, iyadoo ku caddaynaysa sababta keentay diidmada.

### Qodobka 28<sup>-aad</sup>

#### Xeer-nidaaminta Lambarada

1. Wasaaraddu waxay soo saari kartaa xeer-nidaamin lagu horumarinayo ujeeddooyinka xeerkan, nidaaminta lambarada iyo shabakadaha internet-ka, iyadoo tixgelinaysa siyaasadda Isgaarsiinta.
2. Wasaaraddu waxay awood u leedahay inay soo saarto xeer-nidaamiyeyaal lagu dhaqayo lambarro, adeegyo khaas ah oo ay adeeg bixiyaasha laga doonayo in ay hirgaliyaan, iyadoo la dhawrayo maslaxadda guud iyo midda gaarka ah, sida lambarada adeegga deg-degga ah iyo kuwii kale ee loo arko inay yihiin dan-guud.
3. Haddii Wasaaraddu soo saarto go'aan ah in adeeg bixiyaashu ay siiyaan macaamiishooda adeeg lambar guud xaaladaha deg-degga ah ee dhammaan laga isticmaali karo si loo



dhiiri galiyo danta guud waxay adeeg bixiyaashu bixinayaan lambarro degdeg ah oo khaas ah kuwaas oo ka shaqayn kara Puntland oo dhan.

### **Qodobka 29-aad**

### **Xuquuqda Shirkadaha iyo Maalgashadayaasha**

Si waafaqsan shuruucda maalgashiga dalka waxaa la dhiiri-gelinayaa, lana dhawrayaa xuquuqda shirkadaha Isgaarsiinta iyo guud ahaan maalgashadayaasha, waxaana la ilaalinayaa jiritaankooda.

### **Qodobka 30-aad**

### **Oggolaanshaha Qalabka Isgaarsiinta**

1. Wasaaraddu waxay diiwaan-galinaysaa hay'adda loo oggaalado in la siiyo ruqsadda halbeegga shaybaarka qalabka Isgaarsiinta.
2. Wasaaraddu waxay dajinaysaa siyaasadda iyo halbeegyada loo adeegsanayo shaybaarka qalabka.
3. Cid kasta oo wadani ah waa keeni kartaa qalabka isgaarsiinta, markay fasax ka hesho Wasaaradda.

### **Qodobka 31-aad**

### **Xaqa Marinka Adeeg-bixiyaha**

1. Ruqasadlaha bixiya adeeg Isgaarsiineed wuxuu xaq u leeyahay inuu gelin karo qalabkiisa Isgaarsiineed dhulka loo qoondeeyey marka uu dhisayo, waana inuu Wasaaradda u soo gudbiyaa naqshad caddaynaysa meesha uu xarigga marinayo ama uu gelinayo qalabka Isgaarsiinta.
2. Ruqasadlaha bixiya adeegga isgaarsiinta waxaa xaq loogu leeyahay inuu mag-dhaw ka bixiyo dhiba uu u gaystay hantida gaarka ah iyo tan guud, markii ay ku caddaato.
3. Wasaaraddu waxay awood u leedahay inay go'aan ka gaarto, iyadoo marinaysa waddooyinka sharciga wixii is af-garan waa ah ee ka dhasha isticmaalka xaqa marinka uu adeeg bixiyuhu xaq u leeyahay.

### **Qodobka 32-aad**

### **Helitaanka Adeeg Isgaarsiineed oo Baahsan**

1. Adeeg bixiyaasha iyagoo kaashanaya Wasaaradda waxay u hawl-galayaan in dad weynaha ay gaarsiiyaan baahida ay u qabaan isgaarsiinta gaar ahaan magaalooyinka, tuulooyinka, miyiga iyo meel walba oo ay baahi isgaarsiineed ka jirto.
2. Wasaaraddu waxay xil iska saaraysaa helitaanka baahida isgaarsiinta dadwaynuhu u baahan yihiin.



### **Qodobka 33-aad**

### **Tartanka Suuqa Xorta Ah ee Isgaarsiinta**

Waxaa u furan adeeg-bixiyeyaasha isgaarsiinta tartan ganacsi oo xor ah, iyadoo aan la jebinayn Xeerka Isgaarsiinta, Wasaaradduna waxay kormeeraysaa, in dhammaan adeeg-bixiyaashu u hoggaansameen shuruucda tartanka xorta ah, iyadoo mar walba la ilaalinayo hannaanka caddaaladda.

### **Qodobka 34-aad**

### **Ku Takrifalidda Awoodda Suuqa**

1. Waxaa ka reebban ruqsadle kasta oo bixiya adeeg isgaarsiineed, inuu ku kaco fal ujeeddadiisu tahay in wax lagu yeeleeyo ama hoos loo dhigo tartanka suuqa xorta ah.
2. Haddii adeeg bixiye Isgaarsiineed ay ku caddaato in uu ku kacay falal ujeeddadoodu tahay khasaarin hantiyeed oo suuqa ganacsiga isgaarsiinta ku yimaada, Wasaaraddu waxay qaadaysaa tallaabooyinka soo socda;
  - b) Ganaax lacageed oo ay Wasaaraddu xaddiddo iyadoo tix-galinaysa wax yeelada uu suuqa u geystay.
  - t) Haddii waxyeelada uu gaystay falkaasi ka dhalan karto dhibaato loo gaystay cid kale, waxaa loo gudbin karaa maxkamadda awoodda u leh, si ay go'aan uga gaarto fal-danbiyeedkaas, ciqaabta ku habboon iyo in ay xaddiddo mag-dhowga u qalma khasaaraha uu geystay.

### **Qodobka 35-aad**

### **Faafreebka**

1. Ruqsadle kasta oo bixiya adeeg Isgaarsiineed wuxuu mas'uul ka yahay anshaxa isticmaalka adeegga ay bixinayaan, waxayna faaf-reeb ku samayn karaan dadka u isticmaala waxyaalaha ka soo hor jeeda Shareecada Islaamka iyo dhaqanka suuban ee Soomaalida.
2. Anshaxa suuban waxaa hal-beeg u noqonaya mabaadi'da Shareecada Islaamka iyo Dhaqanka suuban ee bulshada.
3. Wax kasta oo ka hor-imanaya mabaadi'da Shareecada Islaamka iyo dhaqanka suuban ee bulshada, waxay shirkadaha Isgaarsiintu ka qaadi karaan tallaabo anshax marin iyo in la xiro isticmaalka adeegga haddii cidda ku xad-gudubtey anshaxa suuban ay joojin weydo isticmaalkaas.
4. Shirkaddu waxay si qoraal ah ku soo war-gelineysaa Wasaaradda go'aanka ama tallaabooyinka anshax marineed ee ay ka qaaday cidda xad-gudubka samaysay.



### **Qodobka 36<sup>-aad</sup>**

#### **Diiwaangelinta-lafta (Sim card)**

1. Shirkadaha isgaarsiintu waxay diiwaangelinayaan dhammaan dadka iska leh lafaha (Sim-cards) talefoonka iyo kuwa la siinayo lafaha (Sim-cards) marka uu xeerkani dhaqan-galo, si loo sugo mulkiyadda iyo xuquuqda gaarka ah ee macmiilka.
2. Si loo fuliyo farqada 1<sup>-aad</sup> ee qodobkan waxaa lagama maarmaan ah inuu haysto macmiilku wax sugi kara aqoonsiga shakhsiga.

### **Qodobka 37<sup>-aad</sup>**

#### **Hirgalinta Xeerkan**

1. Wasaaraddu waxay raacaysaa qaab daah-furan waafaqsanna xeerka isgaarsiinta.
2. Wasaaraddu waxay awood u leedahay in ay kormeerto fulinta xeerkan iyo inay ganaax saarto ciddii ku xad-gudubta xeerkan.

### **Qodobka 38<sup>-aad</sup>**

#### **Ganaax**

Shirkad kasta oo jebisa heshiisyada shirkadaha dhexdooda ama u hoggaansami weyda xeerkan iyo xeernidaamiyeyaashiisa, waxay mutaysanaysaa;

1. Ganaax lacageed oo ay Wasaaraddu jaangoysey kuna soo saartay xeernidaamiyaha xeerkan, kaasoo u dhigma khasaaraha ay geysatey iyadoo Wasaaraddu u saareyso guddi soo qiimaysa.
2. Haddii ay shirkaddu u hoggaansami weydo ganaaxyada ku xusan farqada 1<sup>-aad</sup> waxaa Wasaaraddu kala noqon kartaa ruqsadda ay ku hawl-geleyso.
3. Ganaax lacageed ayaa la saarayaa shirkaddii u hoggaansami weyda tallaabooyinka Wasaaradda, waxaana loo gudbinayaa maxkamadda awoodda u leh.



**Qodobka 39-aad**  
**Iska hor-imaadka Danaha Isdiidan**  
**(Conflict of Interest)**

Madaxda sare ee Wasaaradda iyo qof kasta oo ka tirsan shaqaaleheeda waxaa ka reebban ka shaqeyn arrin ka hor imanaysa ama saamayn ku yeelan karta shaqada ay u hayaan Wasaaradda sida;

1. Danahooda dhaqaale ee gaarka ah.
2. Danahooda dhaqaale ee la xiriira qof ka mid ah qoyskooda ama qaraabadooda.
3. Danahooda dhaqaale ee shirkadahooda ganacsi ama qof uu shirko la yahay.
4. Danno-dhaqaale ee Hay'ad walba uu ka yahay mulkiile, saamile, mas'uul ama wakiil.
5. Danno-dhaqaale ee Hay'ad walba uu kula heshiiyey inuu la shaqeeyo ama wada hadal shaqo kula jiro. xaaladahan oo kale haddii ay dhacaan waa inuu ka tanaasulo danahaas ama ka cudurdaarto ka qayb kalka go'aaminta arrimaha danahaas khuseeya ee Wasaaradda horyaal.
6. Waxaa reebban in Wasiirka ama xubin ka tirsan shaqaalaha Wasaaraddu in uu ku yeesho lahaansho toos ah shirkad hoos tagta awoodda iyo arrimaha loo igmaday Wasaaradda.
7. Mas'uul kasta oo ay ku caddaado inuu ku xad-gudbay qodobada kor ku xusan waxaa laga qaadayaa tallaabo sharciga waafaqsan.

**Qodobka 40-aad**  
**Burin**

Waxaa la buriyey Xeer kasta oo Isgaarsiineed oo aan la socon karin ama ka hor imaanaya Xeerkan.

**Qodobka 41-aad**  
**Dhaqan-galka**

Xeerkani wuxuu dhaqan gelayaa marka Golaha Wakiilladu ansixiyo, Madaxweynaha Dawladda Puntland Saxiixo, laguna soo saaro Faafinta Rasmiga ah ee Dawladda Puntland.



**LIFAAQA KHIDMADAHA ISGAARSIINTA**

Shirkad kasta oo isticmaalaysa adeegyada Isgaarsiinta waxay bixinaysaa khidmadahan hoos ku qoran;

L.r	Magac/Tilmaan	Khidmadda
1	Ruqsadda Isgaarsiinta Puntland	
2	Cusboonaysiinta Ruqsadda Isgaarsiinta Puntland	\$200,000
		\$10,000.00
3	Ruqsadda Saldhiga isgaarsiinta xeebaha ee gaadiidka laga hago	
4	Cusboonaysiinta Ruqsadda Saldhiga Isgaarsiinta Xeebaha ee gaadiidka laga hago	\$100.00
5	Ruqsadda nooca Ateennada (VSAT) anteenno hay'duhu ku shaqaystaan oo u gaar ah	\$100.00
6	Cusboonaysiinta Ruqsadda nooca Ateennada (VSAT) anteenno hay'duhu ku shaqaystaan oo u gaar ah	\$2,000
	<b>Khidmad Bille ah</b>	\$1,000
7	libka Guud ee bil walba (Total sales per month)	
8	Canshuurta Mushaharka Shaqaalaha	5%
		6%
	<b>Khidmadda Isticmaalka Hirarka oo Bille ah</b>	
9	Hirarka(frequencies) shirkadaha isgaarsiinta nooca A :(GSM-900) halkii	\$100.00
10	Hirarka(frequencies) shirkadaha isgaarsiinta nooca B :(1800)	\$50.00
11	Hirarka(frequencies) ka kale	\$50.00

**FIBER OPTIC**

1	Ruqsadda cusub ee Fiber Optic cable	\$300,000
2	Cusboonaysiinta Ruqsadda ee Fiber Optic cable	\$20,000

**Saldhigyada Raadiyeyaasha (HF/VHF) Isgaarsiinta**

Marka laga reebo UN-ka, raadiye kasta waxaa laga qaadayaa khidmadaha hoos ku qoran:

L.r	Magac/Tilmaan	Diiwangalin	Sannadle
1	Ruqsadda Raadiye warbaahin ee cid kasta.	\$200.00	\$100.00
2	Ruqsad raadiye Shirkadaha laamaha ku leh Puntland	\$250.00	\$150.00
3	Ruqsadda idaacadaha (Radio station)	\$300.00	\$200.00

**BOOSTADA**

1	Ruqsadda Boostada	\$200.00
2	Cusboonaysiinya Ruqsadda Boostada	\$100.00



**Madbacadaha Dalka iyo Wargaysyada**

L.r	Magac/Tilmaan	Diiwaangalin	Sannadle
1	Ruqsadaha Madbacadaha Heerka 1-aad	\$400.00	\$200.00
2	Ruqsadaha Madbacadaha Heerka 2-aad	\$250.00	\$100.00
3	Ruqsadda wargaysiyada todobaadle, bille iyo ka badan	\$100.00	\$50.00

**Diwaangalinta Warbaahinta madaxa Bannaan**

L.r	Magac/Tilmaan	Diiwaangalin	Sannadle
1	Ruqsadda Ururada warbaahinta madaxa-bannaan Sannadle	\$500.00	\$250.00
2	Mac'hadyada saxaafadda madaxa-bannaan Sannadle	\$200.00	\$100.00
3	Ruqsadaha gawaarida wax lagu xayaysiiyo	\$50.00	\$30.00

**Telefishinada iyo Adeegga Xiriirka la leh**

L.r	Magac/Tilmaan	Khidmadda Diiwaangalinta	Cusboonaysiin
1	Xarun Telefishin Caalami ah (Short-wave, FM, Satellite – Frequencies in KHZ-2340,-5965-17760-21,660) iyo wixii ka sareeya	\$1,000.00	\$500.00
2	Wakiillada TV-yada gaarka ah iyo wakalaadaha wararka madaxa bannaan.	\$500.00	\$250.00
3	Khidmadda Telefishin Local Frequency Modulation (FM) 108-700 KHZ oo laga daawado magaalada uu yaallo oo keliya sannadle	\$500	\$300.00
4	Xarunta <b>Cable BOX</b> : Hilar la arurshay (frequency box) ee kanaalada kala duwan ciyaaraha, filimaanta, wararka iyo barnamijyada kale	\$2,000.00	\$1,000.00
5	Xarunta <b>Cable BOX</b> Satellite-ka ah Khidmad Bille ah		\$200
6	Ruqsadda guud ee xayaysiinta shaashadaha muuqaalka mid kasta ee cusub	\$50.00	\$30.00
7	Ruqsada shirkadaha filimada soo saara (film producers) ee cusub	\$150.00	\$100.00
8	Ogyeysiisyada SMS-ka Shirkadaha Isgaarsiinta	5%	
9	Xayaysiiska TV-yada	10%	

